

故宮博物院藏

四庫

全書

撤出本

彙編

第二十九冊

故宮博物院編

故宮出版社

第二十九册 目錄

南唐書合訂卷十一—卷二十五

卷十一

卷十二

卷十三

卷十四

卷十五

卷十六

卷十七

卷十八

卷十九

卷二十

..... 一

..... 一

..... 七五

..... 八七

..... 一〇一

..... 一二九

..... 一五三

..... 一六三

..... 二二七

..... 二六五

..... 二七七

卷二十一		三〇七
卷二十二		三二九
卷二十三		三八五
卷二十四		四〇三
卷二十五		四一九

欽定四庫全書

南唐書合訂卷十一

明 李清 撰

忠義列傳

劉仁贍

劉仁贍字守惠淮陰洪澤人父金事吳武王有戰功至
濠州團練使仁贍略通儒術好兵書有名於國中事烈
祖歷黃袁二州刺史

馬令書曰韋建先為袁州刺史清淨無所擾郡大治
數年入為統軍以仁贍代仁贍敏悟親綜簿書時有
釐革郡政益治而百姓猶思建

入為龍衛軍都虞候拜鄂州節度使元宗伐楚仁贍帥
州師克巴陵撫納降附甚得人心保大中湖湘戍兵潰
歸復失故楚地上書者多謂周人有南侵之謀淮上石
偶人言元宗聞而惡之斷其首自六月至冬不雨長淮
可涉民流入周邊城遮殺之不能禁唐亦興屯田修邊

備以壽州最為要地十三年徙仁贍為清淮軍節度使
自楊氏有吳歲募淮涸輒增戍以備侵軼謂之把淺監
軍吳廷紹以為無事徒費糧糗罷之仁贍表陳不可罷
未及行周已遣將李穀王彥超韓令坤等帥師大入詔
書暴我納李金全援李守貞慕容彥超結契丹太原之
罪報至上下失色仁贍獨部分號令宴勞吏士閒暇如
平時十一月出兵破城南大柵殺周兵數千人

宋史曰張永德師至壽春劉仁贍堅壁不下永德出

疲兵誘之傍伏精騎每戰陽不利北退三十里伏兵突起來攻大敗之仁贍僅以身免 愚按此宋史誇大語耳敗者乃劉彥貞非仁贍事見後

元宗遣神武統軍劉彥貞將三萬人救壽州十四年正月彥貞至來遠鎮距壽州二百里軍容甚盛李穀燒營夜遁保正陽彥貞率戰艦數百艘沂淮而上仁贍曰敵已畏君當持重養盛以俟間若遽求戰而不勝則大事去矣彥貞不從仁贍曰周人遯必設伏遇之將敗績乃

率勵其下益兵固守彥貞果大敗歿於陣伏尸三十餘里亡戈甲三十萬周世宗自將攻城屯於城西北淝水之陽徵宋亳陳穎許秦徐宿州丁夫數十萬備攻城雲梯洞屋下臨城中數道同時進攻填塹陷壁晝夜不休如是者累月每鼓角四發聲震牆壁皆動

馬令書曰世宗圍之數重以方舟載礮自淝水中流擊其城又束巨竹數千竿上施板屋號竹龍載甲士攻之又決其水砦入淝河攻之百端

我援兵在外者見利輒進常陷伏中故屢敗仁贍雖知
外援敗意氣益壯覘世宗在城下據胡牀督攻城仁贍
素善射自引弓射之箭去胡牀數步輒墮世宗命進胡
牀於箭墮處後箭復遠數步而墮仁贍投弓於地曰天
果不佑唐耶吾死城下耳終不失節於是世宗遣中使
來諭曰知卿忠義然士民何罪又親駕臨城招之皆不
從自正月至四月不可下

馬令書曰是歲大暑霖雨彌旬周兵營寨水深數尺

淮淝暴漲礮舟竹龍皆飄南岸為唐兵所焚周兵多
死世宗東趨濠梁以李重進為廬壽都招討使

世宗還京師楊泰滁和舒蘄諸州皆復為我守渦口定
遠周兵戍守者亦皆為我師襲破江左幾復振而壽州
之圍獨不解

宋史張永德傳曰時唐人以周師在壽春攻圍日急
又恃水戰乃大發樓船蔽江而下泊於濠泗周師頗
不利唐將林仁肇帥衆千餘水陸齊進又以船數艘

載薪乘風縱火將焚周浮梁周人憂之俄風反唐人
稍却永德進兵敗之又夜使習水者沒其船下繫以
鐵鑊引輕舠急擊唐人不得進溺者甚衆奪其巨艦
數千艘永德解金帶賞習水者乃距浮梁十餘步以
鐵索千餘尺橫截長淮又維巨石自是備禦益堅矣
俄又敗千餘衆于淮北岸獲戰船數十艘唐人多溺
死

元宗遣元帥齊王景達以兵數萬來援分重兵據紫金

山列寨十餘處與城中傳烽相應築甬道抵城通餽餉
六月仁贍出兵殺周兵數百焚攻城洞屋甚衆

資治通鑑曰侍衛步軍都指揮使彰信節度使李繼
勲營於壽州城南仁贍伺繼勲無備出兵擊之殺士
卒數百人焚其攻具

周將李重進等兵力頗屈仁贍因請乘世宗歸以邊鎬
守城自出決戰景達畏懦又方任陳覺固不許仁贍憤
鬱得疾

五代史曰明年正月世宗復至淮上盡破紫金山砦
壞其夾道唐兵大敗諸將往往見擒而唐之守將廣
陵馮延魯光州張紹舒州周祚泰州方納泗州范再
遇等或走或降皆不能守雖唐君臣亦皆震懾奉表
稱臣割地輸賦求效款獨仁贍堅守不下

少子崇諫夜泛小舟渡淮謀紓家禍為軍校所執仁贍
命腰斬之監軍使文德殿使周廷構哭於中門又求救
於仁贍妻薛氏薛氏曰崇諫幼子固所不忍然貸其死

則劉氏為不忠之門

南唐近事載薛氏言曰某郎妄最小子提攜愛育情
若不及奈軍法至重不可私也名義至大不可虧也
苟屈公義使劉氏之門有不忠名妄與令公何顏以
見三軍

促命斬之然後成喪聞者皆出涕十五年二月世宗復
親征屢戰皆克我軍被俘馘者四萬人餘衆不能復整
朱元朱仁裕孫璘皆降周仁贍聞之扼吭憤嘆世宗知

壽州且下獨嘉仁膽忠恐城破殺之乃下詔諭使自擇
禍福三月甲辰又耀兵城北而仁膽已困篤不知人監
軍周廷構營田副使孫羽等為仁膽表請降戊申世宗
次城北受之昇仁膽至幄前撫勞嘉嘆拜天平軍節度
使兼中書令命還城養疾辛亥晝晦雨黃沙如霧世宗
在下蔡疑有變馳騎覘之乃仁膽卒年五十八州人皆
哭偏裨及士卒自剄以殉者數十人世宗遣使弔祭
馬令書載世宗制曰劉仁膽盡忠所事抗節無虧前

代名臣幾人可比予之南伐得爾為多

追封彭城郡王錄其子宗讚為懷州刺史賜莊宅各一區元宗聞仁贍死哭之慟贈太師中書令謚忠肅嘆曰仁贍有知其肯捨我而受周命邪

馬令書載元宗所焚誥曰魂兮有知鑒周惠耶歆吾命耶

是夕夢仁贍若拜謝庭中

馬令書曰壽州故治壽春世宗以其難克遂徙城下

蔡而復其軍曰忠正曰吾以旌仁贍節也

加封衛王後主立進封越王開寶中仁贍子崇諒為進
奉使宋太祖嘉其忠臣後特命為都官郎中仁贍至今
廟食壽春不絕

論曰政和中先君會稽公為淮西常平使者實請於朝
列仁贍祀典且名其廟曰忠顯後又常寓家壽春方世
宗攻下壽州廢為壽春縣徙壽州於下蔡故壽春父老
喜言仁贍死時事言其夫人不食五日卒今傳記所不